

# LETTRE

14

DE MONSIEVR

le Duc d'Orleans, en-  
uoyée au Roy.

309  
6002

*Boston*

1632



A PARIS,

Par ANTOINE ESTIENE, P. MET-  
TAYER & C. PREVOST, Impri-  
meurs ordinaires du Roy.

---

M. DC. XXXII.

*Avec Privilege de sa Majesté.*

*Wells  
14 pp.  
Slav*

Acc 83-101(309)

Digitized by the Internet Archive  
in 2010 with funding from  
University of Ottawa





L E T T R E

D E M O N S I E V R

*le Duc d'Orleans, enuoyée  
au Roy.*



ONSEIGNEVR,

Il est vray que le de-  
voir auquel m'assujerit ma nais-  
sance, & que mon inclination à hono-  
rer vostre personne, m'obligeront  
toujours de rendre à vostre Majesté  
toute sorte de respects. Mais com-  
me ces derniers iours elle a desiré de  
moy des submissions extraordinaires  
& sans exemple, Je luy auouë, que  
pour m'y porter, il ne falloit pas vne  
consideration moins puissante que

A ij

celle qui m'y a fait resoudre. Je croy  
aussi, M O N S E I G N E V R, que Mon-  
sieur de Bullion n'aura pas manqué  
de dire à vostre Majesté, les protesta-  
tions que ie luy ay faites, quand il me  
dit, sur l'instance que ie luy faisois  
pour sauuer la vie & rendre la liberté  
à mon Cousin le Duc de Montmo-  
rency, Que le seul moyen que i'auois  
pour l'obtenir de vostre Majesté,  
estoit de me soumettre absolu-  
ment à toutes vos volontez. Que de  
vous en demander des assurances,  
c'estoit vous irriter, & blesser la con-  
fiance que ie deuois prendre en vo-  
stre bonté. Qu'estant vne grace dont  
vous deuiez auoir l'obligation & la  
gloire toute entière, ie faisois mes-  
mes tort à mondit Cousin, si ie ne la  
laissois à la disposition de vostre Ma-  
jesté: Et que l'obeissance au eugle que  
ie luy rendrois en cette occasion, me



deuoit mettre hors de crainte, & me donner des esperances aussi certaines pour cét effect que ie les pourrois souhaiter. Tellement, M O N S E I G N E V R, que ne pouuant pas douter, que mondit Sieur de Bullion n'eust charge de vostre Majesté, de m'en parler de cette sorte, & de me donner à cognoistre, qu'asseurémēt ie deuois attendre de sa clemence la conseruation d'une personne qui luy estoit considerable par le merite de ses ayeuls, les éminentes qualitez, & les signalez seruices qu'il a rendus à vostre Majesté, en tant d'occasions où il a respendu son sang, & en deux batailles qu'il a gagnées, tres-importantes au salut de vostre Estat & à l'honneur de la France, Je me resolus deslors d'obeir aueuglement à vostre Majesté en tout ce qu'elle me commandoit: & plustost à sacrifier

tous mes intereſts & ceux de mes ſer-  
uiteurs, à eſtouffer tant de iuſtes re-  
ſentimens, à diſſimuler mes plus  
chères affections, & pluſtoſt meſmes  
à renoncer pour vn temps, aux de-  
voirs où la nature m'oblige, que de  
manquer à la moindre des choſes  
que voſtre Maieſté m'ordonnoit:  
croyant qu'elles m'eſtoient preſcri-  
tes, pour meriter vne grace que i'au-  
rois meſmes achetée au prix de mon  
ſang & d'une partie de ma vie. Auſſi  
eſt-ce, ce qui m'obligea à demeurer  
d'accord de cette promeſſe, de pa-  
roître inſenſible à toute ſorte d'eue-  
nemens, inſerée dans les Articles:  
m'ayant eſté représenté qu'elle eſtoit  
neceſſaire, pour diſpoſer entière-  
ment voſtre Maieſté à ce dont ie la  
ſuppliois: & que ſi i'en faiſois diffi-  
culté, ce ſeroit luy donner ombrage,  
que ie ne vouluſſe faire croire, que



i'aurois obtenu d'elle par vn traité  
secret, ce qui deuoit partir purement  
de sa misericorde. C'est en fin ce qui  
m'a contrainct de me reduire au plus  
grand aneantissement où soit iamais  
tombé aucun Prince de ma naissan-  
ce. Mais pour ne rien obmettre en  
vne chose qui m'est si sensible & si  
importante, le rapporteray à vostre  
Majesté les mesmes paroles que ie  
dis précisément à mondit Sieur de  
Bullion, Asçauoir que ie me souf-  
mettois à toutes vos volonte, &  
que ie signois toutes les conditions  
qu'il me presentoit de vostre part,  
sans y rien changer, tant par le res-  
pect que ie vous dois, & l'obeissance  
que ie vous veux toujours rendre,  
que pour l'esperance qu'il me don-  
noit, & que ie conceuois moy-mes-  
me, que cette submission extrordi-  
naire seroit vtile à sauuer la vie & à

rendre la liberté à mondit Cousin: luy protestant formellement, que si i'estois trompé en cette attente, ie luy declarois, pour le dire à vostre Majesté, que ie ne m'obligeois à rien de tout ce que ie signois, puisque c'estoit pour cette occasion, que ie passois par dessus tant de considerations qui m'en deuoient retenir. Ie luy ay renouvelé cette protestation plusieurs fois, & luy ay fait confirmer tres-souuent par ceux qui ont ma principale confiance. Ie l'ay reconnu trop affectionné à vostre seruice, pour croire qu'il ayt oublié d'en rendre compte à vostre Majesté. De sorte, MONSIEUR, que si la resolution que ie prends maintenant vous fasche, permettez-moy de vous dire, que c'est à ceux qui vous ont conseillé vne si grande violence, à qui vostre Majesté s'en doit prendre iustement :



iustement : Car pour moy , i'estois  
sans ce funeste rencontre , absolu-  
ment resolu à ne manquer à aucu-  
ne des choses à quoy ie m'estois en-  
gagé , quoy qu'elles fussent tres-du-  
res & tres desauantageuses. Mais il  
n'y auoit point de conditions si ri-  
goureuses , que ie n'eusse acceptées  
pour le salut d'une personne si chere  
à la France , & qui m'auoit si sensi-  
blement obligé. Que ne deuois-ie  
point donner à l'extrême douleur  
de ma cousine la Duchesse de Môt-  
morency , & aux prieres continuel-  
les qu'elle me faisoit, de me soumet-  
tre à toutes choses ? Et à quoy ne me  
falloit-il pas resoudre , pour me ga-  
rétir d'un opprobre, dont l'on m'eust  
infalliblement chargé , si i'en eusse  
usé autrement ? Ne m'auroit-on pas  
imputé la cause d'une action si de-  
plorable , apres mesmes la menace

que me fit le sieur d'Aiguebonne, de  
 la part de vostre Majesté, que si ie  
 faisois la moindre démarche vers le  
 Roussillón, qu'il en cousteroit la vie à  
 mondit Cousin? ie deuois avec grã-  
 de raison, inferer de ce discours, que  
 ie pouuois esperer vn effect tout cõ-  
 traire, si i'obeissois à vostre Majesté.  
 Mais apres vous auoir rendu les plus  
 basses submissiõs que vostre Majesté  
 eust peu desirer du moindre de ses  
 sujets, cõment aurois ie peu croire,  
 qu'elle n'eust pas esté touchée de cõ-  
 passion, en considerant l'estat où elle  
 reduiroit vn Prince qui a l'honneur  
 d'estre son Frere, par vn effect que  
 personne ne se pouuoit imaginer?  
 Pardonnez-moy, MONSIEUR,  
 si ie vous parle avec trop de liberté: la  
 consideration de mon hõneur & de  
 ma reputation, ne deuoit elle pas  
 vous fléchir? C'estoit vn contre-



poids suffisant à la faute de mondit  
 Cousin : & vostre Maiesté ne peut  
 tirer aucuns auantages de sa iustice  
 en cette occasion pour le bien de  
 son Estat, qu'elle n'en eust receu de  
 beaucoup plus grands de sa cleméce,  
 par mes respects & les benedictions  
 de ses peuples Je sçay bien, MONSIE-  
 GNEVR, que les loix de vostre Royau-  
 me m'obligent à de grands deuoirs  
 enuers vostre Maiesté : Mais ie vous  
 supplie tres-humblement, de consi-  
 derer qu'elles ne destruisent pas cel-  
 les de la nature, qui sont beaucoup  
 plus fortes & plus équitables : Et que  
 comme elles vous obligent à reco-  
 gnoistre les submissions que ie vous  
 rends par toute sorte de témoigna-  
 ges de vostre bonne volonté. Elles  
 me donnent maintenant la permis-  
 sion de me plaindre, de ce qu'elle m'a  
 manqué au sujet le plus important à

mon honneur que ie puisse auoir en ma vie. Le ressentimēt que i'en ay, est si iuste, que vostre Majesté ne le peut pas condamner. Aussi luy protestay-ie qu'il part d'un cœur percé au vif de douleur & de regret, & que la confiance que i'auois prise en vos bonnes graces me le rend beaucoup plus sensible. I'appelle Dieu à témoin, que ie n'ay iamais rien souhaitté plus ardemment, que d'en pouuoir estre honoré, ç'a toujours mesmes esté au milieu de mes plus grandes souffrances l'objet le plus agreable de mes pensées & de mes desirs les plus passionnez. Aussi à quel degré de bonheur n'estimois-je pas la gloire de les auoir acquises, bien que c'eust esté avec vne bresche notable à ma reputation? Mais, MONSEIGNEVR pourquoy m'a t'on enuié si tost vn bié qui m'estoit si cher, & à quelle fin cette



violence sur la bonté de vostre naturel; Que vostre Majesté y face, s'il luy plaist, les reflexions qu'elle iugera necessaires pour son seruice. Et cependant ie la supplie tres-humblement, de n'auoir point desagreable la resolution que ie prends, de sortir de son Royaume, & de chercher chez les Estrangers vne retraite assuree pour ma personne, puis que apres la cognoissance que i'ay du peu de bonne volonté que vostre Majesté a pour moy, je dois apprehender les suites & les consequences d'un si grand mespris de toutes mes submissions. Ce n'est pas, MONSEIGNEUR, que dans l'excez de mes desplaisirs, je ne me flate de la creance que la tendresse & l'affection dont vostre Majesté m'a autresfois donné tant de marques, n'est pas entierement esteinte. Ie ne me puis persuader que vostre

Maiesté qui prend vn soin si particulier des intereſts de ſes Alliez , vueille ternir la gloire qu'elle ſ'acquiert par l'aſſiſtance qu'elle leur donne, en oſtant touſiours le repos & la ſeureté à ſon Frere C'eſt ce que ie remets à la bonté de voſtre Maieſté , luy proteſtant que quelque lieu de la terre que mes diſgraces me donnent pour ma demeure, i'y conſerueray touſiours plus cherement que ma vie, le zele & la paſſion que ie dois à voſtre ſeruice, & que ie ſeray tout le reſte de mes iours inuiolablement,

MONSEIGNEVR,

Votre tres-humble & tres-obéiſſant ſeruiteur & ſubiet.

I

GASTON.

A Montereau Faut-Yonne  
le xii. Nouembre 1632.





